

《那夜．学校二楼女厕》（2016 公开演出版）

时间：晚上

地点：学校 2/F 女洗手间及走廊

（全台暗。）

主播：（幕后音）天水围一间中学发生一宗罕见嘅怀疑自杀案，一个就读该校嘅 16 岁女生被发现倒卧喺学校二楼女厕厕格之内，地下有大量血迹，该女生其后被送往博爱医院，送院期间证实不治。有老师知道事件后表示震惊。

（环境声。拍照声。）

记者：（幕后音）请问你认唔认识死者呢？

老师：（幕后音，哭）佢...佢系好学生嚟架.....年年都考第一.....又乖女.....点解会咁架？  
（哭）

（灯微亮。台上有三格厕格，其中一格被封锁，并挂着「暂停使用」的字句。曼芝步履蹒跚，掩面哭泣走向另一个打开的厕格）

记者：（幕后音）会唔会系因为读书压力太大？

老师：（幕后音）我唔知呀...我唔知呀！（泣不成声）

（幕后音渐小。曼芝坐在厕板上）

芝：（大叫）呀！

（灯暗。另一灯区亮。包与茄蹑手蹑足地钻出。二人手持电筒。茄表情像若有所思，而

包则微微抖颤，仿佛有些害怕)

包：阿茄。不如都系走啦。

茄：惊就咪跟嚟。

包：唔系呢。夜嘛嘛偷走入嚟学校...畀人捉到好大镬架！随时记大过。

茄：啍！我有返学咁耐，乜过都记匀啦！同埋我都有叫过你跟住嚟。系你成只吊靴鬼咁赖死唔走咋嘛。

包：唔好提嗰个字呀！听讲真系好猛架！自从单嘢发生咗之后，连出事嗰格厕格都封埋喇。头先我都同你讲啦，有人夜晚听到二楼女厕有喊声添。讲真，我真系宁愿畀人记大过都唔好撞到嗰味嘢.....

茄：我就系想见吓.....

芝：（突然尖叫）唔好呀！（饮泣）

包：哗！（吓得拉着阿茄退后）

茄：（挣开包）你留喺度，我入去睇吓。

包：唔好去呀，阿茄！

（茄不理。以电筒照着前路慢慢走近厕所）

包：阿茄！（不敢向前。前后张望。）你...你等埋我呀！我去攞架镬！（快步离开）

（灯亮。芝仍在饮泣。茄慢慢走近厕格，以电筒照着芝。）

芝：（被光线吓到）呀～

茄：（也吓一跳）哗！（倒退几步）

芝：（惊魂稍定）你...你系边个？

茄：（把手电筒慢慢照向曼芝，看见了对方的容貌。带点失望）系你？

芝：（这时看到对方容貌）张映雪？

茄：（自言自语）点解会系你.....

芝：张映雪，你做乜会喺度嘅？仲有...你头先做乜搵电筒照住我呀？

茄：（没精打采）你叫番我做阿茄喇。（没好气）同埋...你仲好讲？你夜麻麻匿埋厕所吓人我都未话你！

芝：夜麻麻？（一顿，抬头望望）系唔！做...做乜咁黑嘅？

茄：咁夜，校工熄咗灯紧系黑啦！

芝：（惊觉）吓？宜家几点呀？

茄：（用电筒照照手表）十点半。

芝：（又想哭）死喇！爸爸妈妈见我咁夜都唔返实好担心喇！（找手提电话，却找不着）弊！部电话漏咗喺自学中心添！（想走出去找电话）

茄：唔洗去喇。自学中心锁咗喇。

芝：（慌张地）吓？我啲书同银包锁匙都系晒里面嘞。我有钱点返屋企？

茄：（随口询问）你住好远？

芝：（想哭的声音）屯门码头附近嘞。（顿足）死喇！又通知唔到屋企，咁点呀？（想起）你有冇手提呀？可唔可以借我打返屋企？

茄：（冷淡地）冇呀。

芝：（慌张得有点语无伦次）点会有架？屋企人唔洗搵你架咩？

茄：（有点动气）我唔同你。我死去边都有人会理我！

芝：（觉得自己有点说错话）呃...（冷静了点）咁...唔知学校锁门未呢？

茄：（带点冷酷）锁埋喇。

（曼芝既彷徨又失望，想到伤心处，又开始抽泣）

茄：（不耐烦，感到讨厌）你喊够未呀？返唔到咪咪返嘞！平时以为你系斯文啫，原来仲咁麻烦架！

芝：（渐渐止住哭泣）唔...唔好意思。

茄：（见曼芝反而道歉，也有点不好意思。搔了搔头）咁又唔使.....

（大家都静了一会，不知道再可以说甚么）



（茄低头不语。而芝说完后，也低头默默无言。这时候，包重新从台右的侧门出来，手拿着水桶。慢慢地进台，边走边紧张兮兮地四处张望。）

包：（小声地）咪埋嚟呀...我唔惊你架.....我唔惊...我唔惊.....

（包小心翼翼地走近洗手间门口，接着深呼吸一口，鼓起勇气小声地叫唤茄）

包：阿茄～你冇事丫嘛？阿茄.....

（茄听到包叫自己，不禁感到很滑稽，然后转头向曼芝做一个禁声的手势，再突然打开门。）

包：（被吓一跳，闭上眼，以水桶保护自己）呀～～～

茄：（感到又好气，又好笑，在包头上的水桶底上敲了几下）喂。有鬼都畀你吓走喇！

包：（慢慢抬起头看清楚）嘘。畀你吓死喇。（才放下手上的水桶，忽然瞥见茄身后曼芝的身影，立刻指着她）后.....后面.....

（茄摇摇头，揪起包进洗手间中）

包：（再闭上眼）哗～唔好呀～～～（隔了一会仍听不见任何动听，再打开眼）

芝：（带点腼腆）你好。

包：（眨两下眼，再抹一抹双眼）林曼芝？

芝：系呀。系我。

包：你点解会喺度嘅？

（芝向茄望了一眼，笑了笑，不语。）

包：头先匿喺厕所吓人嗰个就系你呀？

芝：对唔住呀。吓亲你，唔好意思呀。（微微躬身）

茄：又要惊死，又要跟嚟。

包：咁我话过要追到你架嘛，紧系要嚟保护你啦！

茄：嘿！仲话要保护我？都唔知边个保护边个！

芝：咁阿包佢虽然惊，但系始终都叫做够胆返嚟搵你啦！仲带齐武器添！（忍不住笑）

茄：哈哈！

包：（也傻笑，但忽然省起）咪住！

茄：又点呀？

包：（又慌张起来）头先...我出到擗架罅嗰阵，真系见到个好古怪嘅人影！佢披头散发咁，好恐怖架！

茄：你眼花咋？成日凝住会撞鬼，咪见到咩都当系鬼啰。

包：唔系呢～我真系见到架！

芝：乜真系咁恐怖架？

包：（连连点头）嗯嗯。

茄：你听佢吹啦！自己细胆就唔好吓埋人啦！等我出去睇吓！

包：我讲真架！

芝：不如都系睇定啲先啦.....

茄：（望望二人）唉！咁事但啦！我哋留喺度多阵啦。（回到厕格坐下）

（三人一阵静默。）

芝：（望望茄和包）唔知点解...有你哋喺度...忽然间觉得呢个厕所都几舒服...几安全...同几 warm。

包：紧系啦！有我守住个门口，实安全！

茄：嘿！你都几厚面皮架啲！

包：我老豆由细到大都教我，做人要胆大心细面皮厚.....

茄：可惜你前两样都有呢！

包：咩呀？我……

茄：话时话，呢度女厕嚟架喎，你做乜留嚟度？

包：吓…咁…头先你搵我入嚟架嘛……

茄：哦～咁你而家可出返去喇。

包：出…出…出返去？（望一眼门口，甚惧怕）

芝：算啦！我都唔介意佢留低嘅。

包：（喜出望外）哗！曼芝你真系好人。唔只人靚，仲心地好。第时大把入追！

芝：唔好咁讲啦～我今晚返唔到屋企，当系多两个人陪吓我咋！

包：（奇怪）你返唔到屋企？

芝：嗯。我啲嘢锁晒喺自学中心，所以冇钱搭车返去。

包：啊～（自作聪明）就系因为咁你就匿埋喺厕所噃。

芝：（见包乱猜，也不多作解释，只笑了笑）呃…系呢？你哋都仲未讲做乜会咁夜返嚟学校嘅？

包：讲起就长篇咯！你知啦！我追紧阿茄嘛，咁追女仔就紧系要搵啲话题讲吓架啦！讲讲吓讲到近嚟学校闹鬼呢单嘢……（提起「鬼」字，突然一惊，望望四周。见没有动静，稍舒一口气）佢忽然话想入嚟睇睇，探吓险咁话，咁我咪陪埋佢入嚟嘍！

芝：呢个传闻都传咗一排喇。

包：系嘍！不过阿茄佢咁耐冇返学，未听过咋嘛！

芝：讲起嚟…阿茄你好似冇返学几个月喇喎。你有乜事丫嘛？

茄：冇……

芝：你唔介意嘅话，可以同我哋讲架。有心事屈埋屈埋好辛苦……嗰种感觉……

包：系嘍！你讲出嚟，有乜事我实帮你！

茄：（犹疑）……

包：喲，即系咁。我哋能够夜麻麻喺学校二楼女厕相聚吹水，证明我哋系有缘人！不由今日开始，我哋就结拜做契哥契妹，以后你哋有咩事，我照你哋！

芝：（失笑）契哥契妹？你又话想追阿茄？兄妹乱伦系唔啱架喎！

包：咩呀？我哋呢啲系亲上加亲啫！

芝：嘻嘻。估唔到你个人咁得意。平时都唔觉嘅！

包：平时我够觉得你高不可攀啦。又靚又叻。女神嘞，我哋呢啲凡夫点敢同你倾计呀？

芝：你又乱讲嘢啦！你唔怕阿茄黓你咩？

包：点会啫！我阿包对阿茄忠贞不二。无论有个几正嘅女神喺我面前，我对阿茄嘅爱都系唔会动摇嘅！

芝：哈哈～～～

包：哈哈～～～

（茄也忍不住微笑。）

芝：同你哋一齐嘅感觉真系好开心。

包：乜你又有唔开心？

芝：为咗读书...我唔去玩，唔去识朋友，甚至有时连饭都唔食.....当静低落嚟嗰阵，其实有时都会觉得寂寞.....（一阵静默）有时我会谗，自己咁辛苦，其实为咗啲乜？如果我出尽全力，都达唔到目标，我会唔会崩溃？我好惊...好惊.....掌握唔到将来嘅感觉...好恐怖.....

（茄望着芝。大家一阵沉默。）

茄：我觉得你同我家姐有啲似。

芝：吓？点解呀？

茄：我讲唔到点解...我剩系觉得头先你嘅表情同佢好似。唔知...你哋系咪同一类人？

芝：咁佢系个点嘅人？

茄：佢...佢都系女神嘍！好乖...好叻...好纯...好温柔.....喺佢面前，我有时都有种高攀唔起嘅感觉。（一阵沉默，继而咬牙切齿）但系...一个咁好嘅女仔，就咁畀个衰老豆害死咗！

包、芝：吓？

茄：（沉默一会）阿包，你仲记唔记得今日同我讲个鬼故系点架？

包：我咪话喺三个月前，有个女仔就喺呢个厠格（指指刚才曼芝所在的厠格）死咗，仲



流到一地都系血。之后冇耐，就传出每晚深夜时份，都会喺呢度传出阵阵喊声嘍。

（曼芝怵然一惊，不禁回头看看刚才自己处身的厕格。）

茄：其实嗰个女仔，就系我家姐。

包、芝：吓？

茄：（站起身忆述）当日，我放学返到屋企门口，听到我老豆同家姐唔知因咩事嘈起上嚟……

（灯光转亮。开始重演往事。）

父：（幕后音）返嚟呀！衰女！

（霞匆匆走出来，神色伤心。遇见茄）

茄：（奇怪）家姐？

（霞望见茄，停步。此时，父也走出来。）

父：（大喝）衰女！你走？出到去你咪认你系我个女！

霞：（回头）你嫌我映衰你啫！我唔返嚟咪得嘍？

茄：（惊讶）家姐，发生咩事呀？

霞：（没有直接回应）阿茄。自己照顾自己。（转身离去）

茄：家姐！（捉住霞的手）你唔好走啦！有乜事返嚟先讲好冇？

霞：（甩开茄的手）你唔好跟住嚟！（带着伤心地）家姐行嘅路…你唔好跟嚟……（快步离开）

茄：家姐！（回头望父，见父只呆望着霞离去。茄更激动）老豆！你做过啲咩嚟？点解家姐要走？佢不孬都听晒你话，你叫佢读书就读，做乖乖女就做。从来都有逆过你意。

点解要赶佢走？点解呀？

（父只摇摇头不语。回头离去。）

茄：（向父）喂！喂！（慢慢回到现实）我老豆份人不嬲又闹塞又臭脾气，冇乜人顶得佢顺……我越谗越嬲，又担心家姐，终于追咗出去，见到家姐已经好快上咗部的士驶走咗。嗰日黄昏，我周街搵佢。（越说越伤心）一路搵，一路搵……（一顿）经过学校门口，见到有部救护车停喺度。听到啲人讲先知家姐出咗事。（沉默一会）我想冲埋去，但系周围好多人，我埋唔到去。我眼白白睇住架救护车走咗。我发晒慌想追。（忍不住掉眼泪）追呀追，但系追极都追唔到……到我赶到医院，见到老豆、妈子…妈子喊得好犀利…话畀我知家姐走咗……我当时差啲企唔稳…我扑喺老豆度不停咁打佢。我问佢点解会咁，问佢究竟对家姐做过啲咩，但系佢冇答我、冇出声…连一句声都冇出过……之后，我有再理佢，亦都有再返到屋企……我发誓，我以后都唔会再认佢做我老豆！

（包和曼芝听后，都默默无语，暗暗地为茄和她姐姐的遭遇伤感）

包：就系因为咁，所以你就再有返学？

茄：嗯。

包：照咁讲，传闻里面只鬼系你家姐？

茄：我唔知…但系我唔可以畀家姐死得不明不白。

芝：不如畀我哋帮你丫？

包：（强装镇定）系嘍。既然佢系你家姐，咁就一定唔会害我哋，咁我都唔使惊啦！我哋一于帮你查啦！

芝：唔知喺学校呢度，搵唔搵到啲蛛丝马迹，查明呢件事嘅真相呢？

茄：（有些感动）多谢…多谢你哋……

芝：（对茄笑了笑，然后开始思考）事隔几个月…我谗喺现场都好难搵到啲乜证据……（在洗手间四处走动）就算当日留低啲乜都好，我谗宜家乜都清理晒喇……咁点好

呢？

包：（随口自言自语）唔通真系要搵阿茄家姐只鬼魂出嚟问吓？

茄：一于咁话啦！

包：吓？真...真架？

茄：我真系等唔到喇。以前唔知道鬼魂嘅传闻就话啫，宜家冇呢个线索，我唔可以白白放过！

芝：与其坐喺度白等，主动出击都未尝唔系办法嘅.....

包：咁...咁...但系点搵呀？入咗嚟咁耐都好似冇乜特别咁.....

（灯光突然闪烁。）

包：咦？我乱噏架咋！唔...唔...唔系咁邪呀？

工：（幕后音）邪？嘿！身正岂怕影子斜？

包：边...边个？

芝：喺出面呀！

茄：边个喺出面？快啲出嚟！

工：（披头散发地进台，带点慵懒地说）世界变咯！你哋偷偷走入嚟学校，居然仲可以咁大大声嘅？

茄：（见对方不似是鬼，鼓起勇气）你...你究竟系边个？系人定系鬼呀？

工：（冷笑）嘿...我？嘿嘿...生为异乡客，死为陌路魂。系人定系鬼？有分别咩？有分别咩.....

茄：都唔知你噏乜！你系咩人？你鬼鬼崇崇匿埋喺出面做乜？

工：嘿。一班鬼鬼崇崇匿喺厕所嘅人，话人哋鬼鬼崇崇咁匿埋.....好，好。既然你哋问到咯，我咪答啰。我系呢间学校嘅夜班校工，你哋可以叫我做忠叔。

茄：（放胆走前两步质问）校工？我都未见过你嘅？

工：（讽刺地）你上早堂我返夜班，楚河汉界壁垒分明，从未相遇有乜出奇？况且，靓妹～你一年返得几多日学呀？边有资格话未见过我？

茄：你识得我？

工：哼！（突然瞪着双眼望向三人，然后指着包）你！

包：我？

工：过嚟！

包：做...做咩呀？

工：（指着包手上的水桶）水桶。

包：咩...咩呀？

工：水桶，学校物资。攞返嚟！

包：（犹疑一下之后递过）畀返你嘍！

工：（接过水桶后坐下，然后娓娓道出）3E班学生张映雪。2000年6月2日出世。上学期考全级176。操行D级。直至你最后一日返学嗰日之前，全年一共记咗小过5次，缺点16次。你屋企父母双全，仲有一个家姐张映霞（一顿），读5A班。但系好可惜，佢喺4月1日当日逝世，而自从嗰日之后，你就再有返过学喇。

茄：（开始激动得颤抖起来）你识我家姐？

工：（沉默一会）系我第一个喺佢临死前发现佢嘅。

茄：咁你记唔记得...佢...佢有冇讲过啲乜？

工：（黯然）记唔记得？嘿！记得！（陷入回忆之中）三十年前黄丽霞，三十年后张映霞，所做过所讲过嘅，我都记得清清楚楚。

茄：你又喻乜呀？关三十年前咩事呀？

工：历史...总系不断重复...又重复.....三十年前又好，三十年后又好，两个阿霞都一样咁傻，都一样做咗件足以令自己跌入地狱嘅错事。

茄：咩地狱呀？我家姐系女神、系天使嚟架！你唔好乱喻呀！

工：（凝视着茄）咁...你话杀人...系咪要落地狱？

茄：咩杀人呀？你再乱喻信唔我搵你丫喺？

工：的确系杀人！仲要系杀一个血脉相连，而且完全唔识反抗嘅人.....

茄：（激动地）你收声！（想扑向校工）

包、芝：阿茄！冷静啲呀！（捉住茄）

工：（默默走到封闭了的厕格前，悲伤地抚摸封条）本来，我以为我所做过嘅事、阿霞所做过嘅事，永远都唔会再有人知，然后我可以呃自己，当件事从来都有发生过.....

但系点解？点解偏偏三十年后，世上又有一个阿霞，将历史又再重演一次，又再提醒我...原来我一直都仲系喺地狱里面，未曾出过嚟？

茄：你痴线架！有病就去睇医生啦！喺度乱噏！我家姐咁乖女，你话佢杀人？你唔好屈佢噃！

工：人总系以为尘归尘，土归土，死咗就一了百了，殊不知即使个秘密深埋地下三千尺，终归都有一日会被揭露出嚟.....嘿嘿...哈哈.....好！好！冇得避喇！揭开啦！等我哋一齐受审判啦！（撕开封条，走进在杂物中拿出一本日记）呢本系你家姐留喺学校的日记簿。你自己睇吓。

（茄一手夺过日记，望着日记封面，但看着又看着，却总不敢打开）

芝：（柔声地）不如，畀我哋嚟丫。

茄：（目光既带着哀愁，又带着感激地看看曼芝与包）嗯。

芝：（接过日记和电筒，慢慢翻到最后有写字的几页，与包一起看。看到一处，与包对望一眼）2014年3月25号.....（声音渐小）

（灯区亮。霞进台，面无表情。杰进台快步走向霞）

杰：（紧张）点呀？你系咪真系验清楚架喇？

霞：我验第一次都唔信邪，再买一支验第二次。结果都系一样。

杰：（左右踱步，然后下定决心）咁生佢出嚟啦！

霞：（突然转激动）生？咁我仲点返学呀？我哋又点同屋企人讲呀？边个赚钱养呀？住边呀？你识凑咩？低能架你？以后我点见人呀？

杰：咁唔系点噃？唔通落咗佢咩？人命嚟架！

霞：我唔知呀！你唔好再烦我！总之件事我已经同你交待得清清楚楚。个肚系我嘅，我会自己做决定。你走啦！我哋以后都唔好再见喇！

杰：阿霞！我会负责任架！你信我！

霞：唔使。呢个负责任唔使你负，你亦都负唔起。

杰：霞！

（霞瞪着杰。最终杰亦愤然离去。灯区暗。）

芝： 2014年3月31号.....

（另一灯区亮，心与友人在谈八卦。霞向心冲前。）

霞： （扯着阿心）八婆！

（霞想搵阿心，但却被阿心捉住）

心： 发咩癲呀你？

霞： 够胆做够胆认！我啲事系咪你爆出去架？

友： 做咩啫？你过多几个月见肚之后都瞒唔到架啦！阿心早少少讲出去，有咩问题先？

霞： （不理友人，向着阿心）枉我当你好姊妹！你将我啲嘢当八卦新闻周围唱？我讲你知嗰阵你仲保证唔同人讲，你讲大话！

心： 嘿！讲到讲大话，就点都唔及你！全世界都以为你系乖乖女，品学兼优嘞！当正你女神咁。睇怕你都系时候落返神坛啦！

霞： 死八婆！

（霞挣扎要打心。心和友人让霞推跌。）

心： （假意）哎呀！唔好意思嘞！冇事丫嘛？顾住个肚呀！有咩事我哋唔觉意做咗杀人凶手就弊喇。

（心和友二人大笑离去。）

霞： （大叫）你同我困住呀！我唔会就咁算架！

(灯区暗。另一灯区亮，霞走进灯区。)

霞：（摸着肚子）BB呀BB。妈咪真系好锡你架。知唔知？BB乖，唔使惊...听日...妈咪就落咗你啦。放心啦！好快架咋，好快就唔痛架喇。BB乖呀，你唔可以影响妈咪生活架！你公公婆婆不嬲都当妈咪系乖乖女嚟，妈咪唔可以令佢哋失望架！知唔知？乖！好快...好快就唔痛...好快就有事.....（离台）

(灯区暗。)

工：无情，总系比有情容易。为自己打算，点都有要为埋人设想咁辛苦。特别系一个唔识出声，唔识喊出嚟嘅小生命，冇人会帮佢谗，一个都有。（一顿）嗰日，佢匿埋喺二楼女厕，（霞于此时步履蹒跚地走到台中，满脚血红，又显得身体虚弱）想用自己嘅方法去落个BB.....一模一样，同三十年前一模一样.....（霞终于支持不住，跌坐在地上。）好多血...成地都系血.....（校工走近霞的身边跪倒，扶起霞的上身。茄也想走上前，但好像被隔开一样无法接近。）一模一样...一模一样.....（悲伤地）阿霞.....点解唔肯生佢出嚟？点解？

霞：（气若游丝）求吓你...千祈唔好讲出去.....我已经令阿爸好失望.....阿爸佢...跪喺地.....跪喺地求我唔好落咗个BB...仲话...会同阿妈帮手湊大佢.....但系我有听...我净系谗住唔可以畀其他人知，要好似冇事发生过.....我要塞住阿心把口，等啲人继续信我...信我...系乖乖女.....求吓你...千祈唔好讲出去.....

工：点解？点解又系咁？点解一个二个都要死，然后留低我喺地狱？

茄：（大叫）够喇！够喇！唔好再讲喇！

(全台灯暗。射灯照着包。)

包：自从嗰日之后，阿茄就返咗屋企。

（另一灯区亮。父进场，茄站在父面前）

父：（柔声）返嚟喇？阿雪。

茄：嗯。

父：入嚟啦！冲个凉就瞓阵啦。今晚出街食。

茄：嗯。

（灯区暗。）

包：之后阿茄讲番，话自己好唔惯嗰，仲话好似以前咁一开口就嗌交自然啲！其实佢晒命啫，睇佢个样不知几开心！（一顿）

而曼芝佢返到屋企之后，屋企人见佢成晚冇返屋企，闹佢闹得好紧要。

（另一灯区亮。芝在当中正低头被责骂。）

芝：爹咁妈咪，对唔住呀！我以后就算要温书，都一定会返嚟食晚饭架喇。

包：后嚟到咗学期尾，佢依然考返第三。但系佢冇再喊，仲笑得好开心添。

（芝灿烂地笑。灯区暗。）

包：至于我喇嗰～我都有乜变丫。阿妈依然成日都要返工，放低零用钱就任得我点用。

每日逍遥自在，想去边就去边。不过，唔知点解呢？虽然我冇人管，又唔忧冇钱用，但系都好似冇阿茄、曼芝佢咁开心咁嘅……

—全剧完—